

Schwowische Gschicht vun Jakob Vorberger

„Kerweifreid“ in Freidorf

Weil am nächste Sunntach in Freidorf Kerwei ist - un sogar Jubiläums-Kerwei, do des Dorf heier 250 Jahr alt werd - will ich a Gschicht verzähle, die vor scheene Johre dort passiert ist.

Es war an am Kerwei-Samstach. De Jergl hot de ganze Tach nix zu hewe (trinke) kriecht, dassr wann am Owed die Gäst aus Ulbetsch in de Hof gsprengt kumme, bei klorem Vestand ist, zu arweite awe genuch, demit 'm der „truckeni Tach“ schnelle vegehn soll: Stall ausmiste, Blume giesse, Hof, Tenn un Gass ufspritze. Umsunst hote uf die Weinkamme gschaut, dort war a Hängschloss an de Tier un die Schlissl im Scherzesack vun seine Nantschi.

Des war am Owed um sieweni fertich. Kuche war geback, gschlaches Gfliegl in de Rein ufm Kuchltisch un zwaa bliehweiss iwezooni Better for die Gäst im Paradizimme an de Gass. Zuletzt hot se noch die Steeje im Gassehaisl un de Gangstorz mit „rote Erd“, des is roti Erdfarb in Wasse ongemach, geweisslt. Die alti Lawoor mit de iwrich gebliweni „roti Erd“ noher in de Gang neue die Kuchltier uf a Hockl gstellt un 'm Jergl onbefohl, er soll se in de Schoppe traan. Der hot awe de Teerische gspielt un während

sei Aldi sich drin gewasch hot, draus spekuliert, wie me dem Hängschloss an de Weinkamme beikumme kennt. Wies Nantschi rein war, is es mit om Kerwl unne 'm Arm in de Hof kumm un hot gsacht: „Jergl, ich geh jetzt ins Gschäft un du werst dich wasche; wann ich homkumm, geht unse Kerwei on.“ Gsacht - un fort wars - un de Jergl drin am Scherzesack. Fizi! Es Nantschi hot de Schlissl mitghol - vorsichtshalwe. Wie'm grad de Zorn steit iwe des knickerischi Weib, sichte, wie die Katz ufm Tisch sitzt un an om Hinglschunke knawwert, den se aus de Rein gezoo hat. „Ja, bist denn du aach a Kerweigast, du hooriche Rauwe!“, hote gschrie un mi'm Schlappe geworf. De Schlappe - gut gezielt un schlecht getroffen - is iwe de Tisch ins Kuchlbett, die Katz ohne Schunke in de Hof. De Jergl sucht de Schlappe un zieht die Tuchent rune - un schau mol - im Bett leije verstecklt drei Literflasche mit Raki. Die Katz hot vor Freid de Schunke kriecht, un es Nantschi war noch nit zugutst im Gschäft, war de Jergl seelich, hot nor Tische un Better um sich gseh un a Dutznd Katze mit grad so viel Hinglschunke im Hof.

Do ism eingfall, dass er sich jo wasche soll. Duster, weil schun noh acht Uhr, un bei „schlechte Sicht“ ism die Lawoor ufm Hockl im Gang grad kut kumm. Noh om weitre starke Schluck aus de Flasch isr drongang: Es Gsicht hote sich gewasch, Hals un Ohre, Brust und Buckl, un weil's Wasse so angenehm warm war - vun de Sunn - aach glei de Kopp.

Dann hote mit Ach un Krach die Lawoor uf die Erd gstellt un is dann mitm Fuss... uf de Lawoor-Rand - un alles hat rum-gelee: de Jergl, es Hockl un die Lawoor.

Weil sich de Gangstorz imme schnelle gedreht hot, ism nix anres iwrich gebliewe, wie - ohni abgeputzt - sei Bett zu suche. Anstatt in des in de Kuchl, isr ins Paradizimme. Wie er une de bliehweissi Tuchent war, war draus finste und sei Aldi mit de Nochberin an de Kuchltier, die kumm ist, de Küche zu schaue. Wie se nein sein, hots Nantschi for Freid geruf: „Jergl, was hume heit!?“ Un de Jergl prompt ausm Zimme: „Kerwei!“ „Ei du Gott, was sucht der im Paradizimme?“ sachts Nantschi, brennt es Petrolyumlicht on un holt die Nochberin mit. Wie es den im Bett sieht, rot im Gsicht wie a Indiane, die roti Pelstre un die roti Tuchent - is'm jo des Licht fast aus de Hand gerutscht. „Jesses, der is jo volle Blut!“ hots gschrie. Sacht die Nochberin: „Wieso? Zuvor hote sich noch ufm Gang gewasch un ist noch mitm Lawoor umgfall.“ Schreit es Nantschi: „Ei, do stinkts jo noh Raki! Der hot jo a volle Kopp - un sich in de roti Erd gewasch!“ Ruft de Jergl: „Nantschi, was hume heit!?“ Druf es Nantschi: „Tolwai!“ un is dem „Indiane“ in die roti Hoor. Alles umsunst.

So gehts, wann die Weiwe an Kerweisamstach schnass sein un die Weinkamme absperre - un die Männe dann doch noch vorm Vedorschtre de Raki une de Tuchent un die roti Erd in de Lawoor fine.